

INFORMACIJA O KREDITU RAZVOJNE BANKE VIJEĆA EVROPE ZA SUFINANSIRANJE PROJEKTA JAČANJA ZDRAVSTVENOG SEKTORA (*Health Sector Enhancement Project – HSEP*) – DODATNO FINANSIRANJE

Procjenjena vrijednost ukupnih projektnih aktivnosti za nastavak Projekta jačanja zdravstvenog sektora-dodatno finansiranje (HSEP AF) iznosi 10.700.000 EUR-a za Federaciju Bosne i Hercegovine. Projekt se finansira iz tri izvora: Međunarodna razvojna asocijacija (IDA), Razvojna banka Vijeća Evrope (CEB), Budžet Federacije BiH i učešće ostalih lokalnih vlasti u Federaciji BiH.

Međunarodna razvojna asocijacija (IDA) i Bosna i Hercegovina zaključile su dana 05.07.2011. godine Sporazum o finansiranju (za Projekat jačanja zdravstvenog sektora-HSEP AF - dodatno finansiranje) broj kredita 4912-BA u iznosu od 6,5 miliona SDR. Na osnovu ovog Sporazuma potpisan je Subsidijarni Sporazum za Federaciju Bosne i Hercegovine 30.09.2011.godine između Bosne i Hercegovine i Federacije Bosne i Hercegovine u iznosu 3.714.000 SDR. Sufinansiranje Vlade Federacije BiH je 10% od iznosa kreditnih sredstava IDA-e. Ova sredstva su postala efektivna 27.12.2011. godine, te su započele aktivnosti na realizaciji Projekta.

Upravni odbor Razvojne banke Vijeća Evrope, kao sufinansijer Projekta je 16.09.2011. godine odobrio 5.500.000 EUR-a za sufinansiranje nastavka Projekta.

Cilj Projekta je jačanje zdravstvenog sektora, putem restrukturiranja i jačanja primarne zdravstvene zaštite, daljim razvojem porodične medicine, kao i jačanje procesa donošenja politike putem razvoja i implementacije sistema monitoringa i evaluacije učinka zdravstvenog sektora uz kontinuirano unapređenje upravljačkih vještina na svim nivoima zdravstvenog sektora.

Projekat jačanja zdravstvenog sektora-dodatno finansiranje implementira projektne aktivnosti kroz tri komponente:

Komponenta I – Restrukturiranje primarne zdravstvene zaštite obuhvata:

- Opremanje i adaptaciju ambulanti porodične medicine;
- Nastavak obuke kadra iz porodične medicine i podrška edukativnim centrima porodične medicine;
- Standardiziranje preventivno promotivnog rada timova porodične medicine uz testiranje nagradnog plaćanja ;
- Informatizacija primarne zdravstvene zaštite;

Komponenta II - Unapređenje kapaciteta za upravljanje zdravstvenim sektorom, obuhvata:

- Podrška kontinuiranoj edukaciji iz zdravstvenog menadžmenta

Komponenta III – Formulacija zdravstvene politike i podrška Projektu, obuhvata:

- Nastavak razvoja sistema monitoringa i evaluacije
- Istraživanje riziko faktora među radno aktivnim stanovništvom;
- Inovativni grantovi;
- Podrška Projektu.

Dosadašnja implementacija Projekta pokazala je poboljšan pristup primarnoj zdravstvenoj zaštiti, razvojem i širenjem ambulanti porodične medicine na cijeloj teritoriji Federacije BiH, te unapređenje dostupnosti i kvaliteta zdravstvene zaštite. Projekt je omogućio operacionalizaciju pojedinih strateških ciljeva Strategije za razvoj primarne zdravstvene zaštite, a dosadašnjom realizacijom Projekta, stvoreni su značajni preduslovi za dalji razvoj porodične medicine i dalji razvoj sistema monitoringa i evaluacije u zdravstvenom sektoru.

Kako je jedan od strateških ciljeva reforme primarne zdravstvene zaštite osiguranje jednakosti u dostupnosti i kvaliteti zdravstvenih usluga, u dosadašnjim projektnim aktivnostima jedan od ključnih fokusa je bila adaptacija i opremanje ambulanti porodične medicine. U ostvarenju ovog cilja postignuti su značajni napreci, ali se i dalje ukazuje potreba za nastavkom unapređenja infrastrukture. Analize ukazuju da je potreba za adaptacijom i opremanjem ambulanti porodične medicine neophodna u još 59 domova zdravlja koji su kandidovali svoje prioritete tj. lokacije u kojima postoji različit stepen potrebe za adaptacijom i opremanjem, što bi bilo finansirano značajnim dijelom iz sredstava CEB-a

Sufinansiranjem kreditnim sredstvima Razvojne banke vijeća Evrope, omogućila bi se značajna finansijska podrška procesu informatizacije primarne zdravstvene zaštite kroz nabavku informatičke opreme za službe primarne zdravstvene zaštite s posebnim fokusom na službe porodične medicine. Takođe je uz nabavku neophodne informatičke opreme planiran razvoj i nabavka integrativnih softwera za primarnu zdravstvenu zaštitu što bi značajno unaprijedilo sistem monitoringa i evaluacije učinka zdravstvenog sektora. Naime, informatizacijom domova zdravlja unaprijedit će se proces rada, komunikacija, evidentiranje i izvještavanje, a što će sveukupno omogućiti lakše uvođenje novih mehanizama plaćanja zdravstvenih usluga i praćenja ugovora između davaoca i kupca usluga. Sufinansiranjem CEB-ovim sredstvima, ovaj proces informatizacije odvijat će se kroz dvije faze. Pripremna je već započela i podrazmjeva analizu postojećeg stanja, kao i definiranje informatičkih standarda i arhitektonskog dizajna sistema. Implementaciona faza predviđa nabavku informatičke opreme i softwera.

U vezi sa gore navedenim, a uzimajući u obzir da je proces informatizacije, dalje jačanje primarne zdravstvene zaštite razvojem porodične medicine i dalji razvoj sistema monitoringa i evaluacije učinka zdravstvenog sektora, prioritet Federalnog ministarstva zdravstva za naredni period, javlja se potreba sufinansiranja Projekta radi postizanja efikasnijeg zdravstvenog sistema, kroz infrastrukturno unapređenu primarnu zdravstvenu zaštitu.

Na osnovu navedenog Vlada Federacije Bosne i Hercegovine je utvrdila Prijedlog odluke.

